

# Ilinniartitsisut rådii aamma kommunemi ilinniartitsisut siunnersuisoqatigiivi pillugit Namminersornerullutik Oqartussat nalunaarutaat

Kulturimut atuartitsinermullu tunngasut siulersorneqarnerat pillugu inatsisartut peqqussutaanni nr. 8-mi 7. maj 1988-imeersumi § 59, imm. 4, § 62, imm. 2 aamma § 63 naapertorlugit ilinniartitsisut rådii aamma kommunemi ilinniartitsisut siunnersuisoqatigiivi pillugit maleruagassat makku matumuuna aalajangersarneqarput.

## I. Rådit inuttalersorneqarnerat.

### *Ilinniartitsisut rådii.*

§ 1. Meeqqat atuarfinni tamani marluk sinnerlugit aalajangersimasumik atorfeqarlutik ilinniartitsisulinni ilinniartitsisut rådiannik pilersitsineqassaaq. Taakku tassaassapput atuarfiup pisortaa, viceskoleinspektørit, sunngiffimmi sammisassaqaqtitsinermi inspektørit, ilinniartitsisut tjenestemandiusut, ilinniartitsisut kontrakteqarlutik atorfiliusut, timelærerit aamma ukioq kaajallallugu vikariusut. Skolepsykologit, konsulentit aamma perorsaanermut tunngasumik suliallit atuarfimmi aalajangersimasumik nal. akunnerinik atuartitsiffeqartut ilinniartitsisut rådianni ilaatinneqassapput. Ilinniartitsisut atuarfinni arlalinni nal. akunnerinik aalajangersimasumik atuartitsiffeqartut ilinniartitsisut rådianni ataasiinnarmi ilaasortaasinnaapput. Ukiumi atuarfusumi atuarfik nal. ak. amerlanernik atuartitsivik ilaasortaaffussaaq. Nalornisoortoqaqtillugu kommunalbestyrelsep taassumaluuniit aalajangiisussanngortitaata aalajangertassavaa atuarfiup sorliup ilinniartitsisuisa rådianni ukiumi atuarfusumi pineqartumi ilaasortaanissaq.

*Imm. 2.* Atuarfinni aalajangersimasumik atorfilimmik ataasiinnarmik marlunnilluunniit ilinniartitsisulinni taakku ilinniartitsisut rådiannik sulissapput.

*Imm. 3.* Ilinniartitsisut rådiannik pilersitsineqassaaq Namminersornerullutik Oqartussat atuarfiutaanni, inoqarfinni kommunet arlaannaalluunniit atasuunngitsuniittuni, aamma atuarfinni ineqarfigalugillu nerisaqarfusuni landstingip peqqussutaani nr. 6-imi 16. oktober 1979-imeersumi § 11, imm. 3 naapertorlugu pilersinneqarsimasuni.

### *Kommunemi ilinniartitsisut siunnersuisoqatigiivi.*

§ 2. Kommuneni ataatsimit amerlanerusunik meeqqanut atuarfeqartuni kommunemi ilinniartitsisut siunnersuisoqatigiivini pilersitsineqassaaq. Taakku tassaassapput atuarfiup pisortaa ataaseq, viceskoleinspektøri ataaseq imaluunniit sunngiffimmi sammisassaqaqtitsinermi inspektøri kommunemi atuarfimmi taamaattumik atorfileqarsimappat, aamma kommunep atuarfiinit tamanit ilinniartitsisunut

sinniisoq ataaseq.

*Imm. 2.* Kommunemi ilinniartitsisut siunnersuisoqatigiivnut qinersineq ukioq atuarfusoq ataaseq atortuusarpoq. Kommunemi ilinniartitsisut siunnersuisoqatigiivi ilaasortaaffigineqassapput skolepsykologimit, kommunemi skolepsykologeqarpat meeqqat atuarfiani aalajangersimasumik nal. akunnerinik atuartitsiffeqartumik.

**§ 3.** Atuarfiit pisortaat, viceskoleinspektørit aamma sunngiffimmi sammisassaqaartitsinermi inspektørit meeqqat atuarfiani aalajangersimasumik tiimeqartut ukiut tamaasa 1. maj nallertinnagu kommunemi atuarfinni pisortat tamarmik, taamatullu viceskoleinspektørit sunngiffimmilu sammisassaqaartitsinermi inspektørit tamarmik akornanni sinniisutut aallartitassaminnik qinersissapput. Qinersinissaat taaneqartut kommunemi ilinniartitsisut siunnersuisoqatigiivini siulittaasup isumagissavai

a) atuarfimmi pisortat, viceskoleinspektørit sunngiffimmilu sammisassaqaartitsinermi inspektørit qinersiartorlutik ataatsimiigiaqqullugit imaluunniit taamaaliornissaq ajornarpat

b) qinigassanngortitassanik telegrammikkut imaluunniit allakkatigut siunnersuuteqaqqusilluni.

Siunnersuutit siulittaasumit tiguneqareersimassapput 1. april nallertinnagu. Tamatuma kingorna allakkatigut telegrammitigulluunniit taasineqassaaq § 4 naapertorlugu.

*Imm. 2.* Kommunemi atuarfinni tamani ilinniartitsisut ukiut tamaasa 1. maj nallertinnagu sinniisutut aallartitassaminnik akunnerminni qinersissapput. Atuarfik ataasiinnarmik marlunnilluunniit aalajangersimasumik atorfilinnik ilinniartitsisoqarpat taanna ataaseq marluugunillu aappaa kommunemi ilinniartitsisut siunnersuisoqatigiivini atuarfiup sinniisaatut ilaasortanngussaaq.

*Imm. 3.* Kommunemi ilinniartitsisut siunnersuisoqatigiivini siulittaasooq ilinniartitsisut akornannit qinigaappat atuarfimmi, kommunemi ilinniartitsisut siunnersuisoqatigiivisa siulittaasuata suliffigisaani, ilinniartitsisoqatigiit kommunemi ilinniartitsisut siunnersuisoqatigiivini ilaasortassaminnik ataatsimik qinerseqqissapput.

**§ 4.** § 3 naapertorlugu qinersineq allalluni taasinikkut pissaaq.

*Imm. 2.* Taaseqqaarnermi qinigaasoqassappat taassuma taasisinnaasunit najuuttunit amerlanerulluurtunit taaneqarsimanissaa piumasarineqarpoq. Taamatut amerlanerussuteqarnissaq anguneqanngippat taasineqaqqissaaq. Aappassaaneerluni taasinermi qinigassanngortittoq amerlanerussuteqarluartumik taaneqarsimasooq imaluunniit qinersinermi qinigassanngortittoq ataasiinnaq taagorneqarsimasooq qinigaassaaq. Aappassaaneerluni taasinermi aamma aalajangiineqanngippat taasinermi tassani amerlanerpaanik taaguunneqarsimasut marluk kisiisa qinigassanngortillugit pinngitsoorani aalajangiiffusussamik qinersineqaqqissaaq. Aappassaaneerluni taasinermi taaneqartut amerlaqatigiinnik taaneqarsimappata makitsisitsinikkut aalajangerneqassaaq kikkut marluk aalajangiiffusussamik qinersinissami (pingajussaaneerluni taasinissami) qinigassanngortinneqassannersut. Pingajussaaneerluni taasinermi qinigassanngortittut amerlaqatigiinnik taaneqarsimappata makitsisitsinikkut aalajangiineqassaaq.

*Imm. 3.* Sinniisussanik qinersineq immikkut pisassaaq sinniisutut aallartitassanik qinersinermi maleruagassat atorneqartut malillugit.

*Imm. 4.* Qinersinerit ukiumi atuarfusumi tulluuttumi atuutissapput.

**§ 5.** Kommunemi ilinniartitsisut siunnersuisoqatigiivini siulittaasup kommunemi ilinniartitsisut siunnersuisoqatigiivi nutaamik qinigaasut ataatsimiigiaqqussavai, tassanilu qinersineqassaaq § 9, imm. 1, naapertorlugu ukiumi atuarfusumi tulluuttumi atuuttussanik. Rådi ataatsimiigiaqquneqaqqissanngilaq ukioq atuarfusoq qinersiviusimasooq naareertinnagu.

*Imm. 2.* Nunap immikkoortuini pissutsit immikkut illuinnartut pisariaqalersippassuk periaaseq § 3, imm. 1, litra b-mi allassimasoq atorneqarsinnaavoq.

## **II. Rådit pisinnaatitaanerat.**

### *Ilinniartitsisut rådiat.*

**§ 6.** Ilinniartitsisut rådiata aalajangertussaavaa atuartoq immikkut ittumik atuartinneqassanersoq.

Aalajangiineq pissaaq ilinniartitsisut atuartumik atuartitsisuusimasut inassuteqarneratigut aammalu atuartup angajoqqaallu isumasioqatigereernerisigut.

*Imm. 2.* Aalajangiineq atuarfup atuartup angajoqqaavinut nalunaarutigissavaa, taakkualu aalajangiineq atuarfeqarnermut ataatsimiititanut ingerlateqqissinnaavaat allanngortitassaannngitsumik aalajangiiffisassanngorlugu.

**§ 7.** Atuarfeqarnermut ataatsimiititat makku pillugit oqaaseqaatit ilinniartitsisut rådiannit pissarsiariniassavaat:

- 1) Atuarfimmi ilinniartitsinissamut pilersaarummut tassanilu allannguutissanut missiliuut,
- 2) suliap ilinniartitsisut akornanni agguataarneqarnerani periusissat kiisalu sapaatip akunneranut suliassanut pilersaarut,
- 3) atuarfimmi atuartitsinermut atortut nutaat atorneqarnissaat,
- 4) init atuartitsiviusut atortulersorneqarnissaannik pequtilersorneqarnissaannillu siunnersuut,
- 5) aningaasartuutissat atuarfimmut tunngasut pillugit atuarfeqarnermut ataatsimiititat siunnersuutaat,
- 6) atuarfup atuartuinut atuarnerup nalaani atuarnerullu avataani iliuusissanut siunnersuut aamma
- 7) atuarfimmi malittarisassanut siunnersuutit.

*Imm. 2.* Ilinniartitsisut rådiat maleruagassiat erseqqinnerusumik aalajangersarneqartut malillugit atuarfimmi pineqartumi sanaartugassanut tunngasut suliarineqarneranni suleqataassaaq.

*Imm. 3.* Ilinniartitsisut rådiat apeqqutit atuarfimmut pineqartumut tunngasut tamaasa pillugit oqaaseqaateqarsinnaavoq aammalu atuarfeqarnermut ataatsimiititanut imaluunniit kulturimut atuartitsinermullu udvalgimut siunnersuuteqarsinnaalluni.

*Imm. 4.* Ilinniartitsisut rådiat suliassanut sunulluunniit siulittaasumit, atuarfup pisortaanit imaluunniit kommunemi atuarfeqarnermut oqartussaasunit taakkununga ilanngullugit skoleinspektøriunermit imaluunniit skoledirektørimit imminut saqqummiunneqartunut oqaaseqartassaaq.

*Imm. 5.* Ilinniartitsisut rådiata oqaaseqaatai siunnersuutaalu, immaqa ikinnerussuteqartunit oqaaseqaatinik ilaqartillugit, atuarfimmi pisortaq aqqutigalugu taassuma oqaaseqaataanik ilallugit ingerlateqqinneqartassapput. Suliami atuarfup pisortaata oqaaseqaataasa assilineri ilinniartitsisut rådinnut nassiunneqartassapput. Ilinniartitsisut rådiannit oqaaseqaatit ilaatinneqassapput suliassap pisortanut qulliunerusunut saqqummiunneqarnerani.

*Imm. 6.* Inoqarfinni kommunet arlaannaalluunniit atasuunngitsuniittuni aamma atuarfinni ineqarfigalugillu nerisaqarfusuni landstingip peqqussutaani nr. 6-imi 16. oktober 1979-imeersumi § 11, imm. 3 naapertorlugu pilersinneqarsimasuni kommunemi oqartussaasut sinnerlugit naalakkersuisut oqaaseqartussaassaapput.

### *Kommunemi ilinniartitsisut siunnersuisoqatigiivi.*

**§ 8.** Kulturimut atuartitsinermullu udvalgip kommunemi ilinniartitsisut siunnersuisoqatigiivi kommunep atuarfeqarneranut tunngasut makku pillugit oqaaseqartittassavai:

1) Kommunep atuarfik pillugu pilersaarusiaanut tassungalu allannguutissatut missingersuusiat kiisalu kommunemi atuarfinnik allilerinissamut missingersuusiat.

2) kommunep atuarfiini ilinniartitsinissamut pilersaarutinut taakkunanilu allannguutissanut missiliuut,

3) kommunep atuarfiini atuarfimmi nakorsaqartitsineq, meeqqat kigutit nakorsaqartitaanerat atuarfimmilu nerisaqartitsineq pillugit siunnersuutit.

*Imm. 2.* Kommunemi ataasiinnarmik atuarfilimmi oqaaseqaatit imm. 1-imi taaneqartut atuarfimmi ilinniartitsisut rãdiannit tunniunneqartassapput.

*Imm. 3.* Kommunemi ilinniartitsisut siunnersuisoqatigiivi atuarfinnut kiisalu kommunemi atuarfeqarnermut tunngasut tamaasa pillugit oqaaseqaateqarsinnaapput aammalu atuarfeqarnermut ataatsimiititanut imaluunniit kulturimut atuartitsinermullu udvalgimut siunnersuuteqarsinnaallutik.

*Imm. 4.* Kommunemi ilinniartitsisut siunnersuisoqatigiivi suliasat siulittaasumit, kulturimut atuartitsinermullu udvalgimit, kommunalbestyrelsemit imaluunniit skoleinspektøriunermit imaluunniit skoledirektørimit imminut saqqummiunneqartut tamaasa pillugit oqaaseqaateqartussaapput.

*Imm. 5.* Kommunemi ilinniartitsisut siunnersuisoqatigiivisa oqaaseqaataat siunnersuutaallu, immaqaa ikinnerussuteqartunit oqaaseqaatinik ilaqartillugit, skoleinspektøriuneq imaluunniit skoledirektøri aqqutigalugit taassuma oqaaseqaataanik ilallugit ingerlateqqinneqartassapput. Suliami skoleinspektøriunerup imaluunniit skoledirektørip oqaaseqaataasa assilineri kommunemi ilinniartitsisut siunnersuisoqatigiivinit nassiunneqartassapput. Kommunemi ilinniartitsisut siunnersuisoqatigiivinit oqaaseqaatit ilaatinneqassapput suliasap pisortanut qulliunersunut saqqummiunneqarnerani.

### **III. Aalajangersakkat nalinginnaasut.**

**§ 9.** Ilinniartitsisut rãdiat kommunemilu ilinniartitsisut siunnersuisoqatigiivi ukiut atuarfusut tamaasa siulittaasussaminnik siulittaasumillu tullissaanik ilaasortamik akornannit qinersisassapput suleriaasissatillu namminneq aalajangersartassallugit. Allagassanik isumaginnittussamik allatsimik qinersisoqarsinnaavoq. Qinigaaqqittoqarsinnaavoq.

*Imm. 2.* Ilinniartitsisut rãdiat kommunemilu ilinniartitsisut siunnersuisoqatigiivi ulluinnartigut ingerlatsisussanik udvalgiliorsinnaapput sinnerlutik oqaaseqartartussanik maleruagassat suleriaasissatut aalajangersarneqarsimasuniittut naapertorlugit. Udvalgimik ulluinnartigut ingerlatsisussamik qinersineq ukiumi atuarfusumi ataatsimi atortuussaaq. Qinigaaqqittoqarsinnaavoq.

*Imm. 3.* Imm. 1 aamma 2 naapertorlugit qinersinerit tamarmik pisassapput atuarfiit aasaanerani ferielersinnagit atortuussallutillu ukiup atuarfusup tulliani.

*Imm. 4.* Ilinniartitsisut rãdiata siulittaasua atuarfeqarnermut ataatsimiititat ataatsimiinnerini, kiisalu kommunemi ilinniartitsisut siunnersuisoqatigiivisa siulittaasuat kulturimut atuartitsinermullu udvalgip ataatsimiinnerini peqataasassapput taaseqataasinnaanatik.

**§ 10.** Ilinniartitsisut rãdiat kommunemilu ilinniartitsisut siunnersuisoqatigiivi ataatsimiittassapput siulittaasup imaluunniit kommunemi atuarfeqarnermut oqartussaasut tamanna pisariaqartikkaangassuk. Ilinniartitsisut rãdiannut tunngatillugu atuarfiup pisortaataattaq tamanna piumasarigaangagu.

Suleriaasissatut aalajangersakkani allatut aalajangiineqarsimanngippat rãdi aamma ataatsimiiqquneqartassaaq ilaasortaasa sisamararterutaasa tamanna piumasarigaangassuk.

*Imm. 2.* Siulittaasup ataatsimiinnissap sumi pinissaa piffissarlu aalajangertassavai kiisalu ullormut oqaluuserisassat aalajangertassallugit.

*Imm. 3.* Suleriaasissatut aalajangersakkani allatut aalajangiineqarsimanngippat ilinniartitsisut rãdiat

atuarfimmi allagarsiinikkut ataatsimiigiaqquneqassaaq, kommunemilu ilinniartitsisut siunnersuisoqatigiivnut ataatsimiigiaqqusineq allaganngorlugu ilaasortanut tamanut nalunaarutigineqartassaaq. Ataatsimiigiaqqusineq amerlanertigut nalunaarutigineqartariaqartassaaq ataatsimiinnissaq ullunik 14-nik sioqqullugu, kisiannili pissutsit tamanna pisariartikkaangassuk sivikinnerusumik piffissalerlugu pisinnaalluni, taamaattorli kommunemi ilinniartitsisut siunnersuisoqatigiivnik ataatsimiigiaqqusinerit ullunit sisamanit sivikinnerusumik piffissalernagit.

*Imm. 4.* Rådit ilaasortaasa sisamararterutaat piumasaqarsinnaapput apeqqutit suulluunniit atuarfinnut tunngassuteqartut pillugit siunnersuutit oqaluuserinissaasa ullormut oqaluuserisassanut ilanngunneqarnissaannik, kommunemi ilinniartitsisut siunnersuisoqatigiivisa ataatsimiinnerini aamma kommunemi atuarfeqarnermut tamarmiusumut tunngassuteqartut. Ullormut oqaluuserisassatut siunnersuutit ilinniartitsisut rådiil ataatsimiissatillugit ullunik sisamanik imaluunniit kommunemi ilinniartitsisut siunnersuisoqatigiivni ataatsimiissatillugit ullunik qulinik sioqqutsisumik siulittaasumut tunniunneqassapput. Ullormut oqaluuserisassat nivinngarneqassapput atuarfimmi, kommunemi ilinniartitsisut siunnersuisoqatigiivni eqqarsaatigalugit atuarfinni amerlanertigut taaneqartut tulleriinneri malillugit ataatsimiinnissaq ullunik marlunnik ullunilu sisamanik sioqqullugu. Ullormut oqaluuserisassani allasimassaaq inimi sumi piffissamilu sumi allakkiat ullormut oqaluuserisassanut tunngassuteqartut, ullormut oqaluuserisassanut ilanngullugit ilaasortanut nassiunneqarsimanngitsut, qimerluugassanngorlugit saqqumitinneqassanersut.

**§ 11.** Ilaasortat ataatsimiinneri peqataassapput. Peqataasinnaannginneq sumik patseqarnera oqaatigalugu ataatsimiinnissaq sioqqullugu allakkatigut siulittaasumut nalunaarutigineqassaaq.

*Imm. 2.* Ataatsimiinnerit amerlanertigut atuarnerup naliginngisaani pisassapput.

**§ 12.** Ilinniartitsisut rådiat kommunemilu ilinniartitsisut siunnersuisoqatigiivni aalajangiisinnaassuseqarput ilaasortat ikinnerpaamik affaat najuuppata. Aalajangiinnerit taasinerit amerlanerussuteqarnerisigut pisassapput. Oqaaseqaateqarnerni siunnersuuteqarnerniluunniit ilaasortat oqaaseqaammut siunnersuummulluunniit taasisimasut amerlassusii allasimassapput.

*Imm. 2.* Aalajangiinnerit imaqarniliorneqarnissaat siulittaasup isumagissavaa. Ikinnerussuteqartut piumasarisinnaavaat isummatik allaasut aalajangiinnerit allanneqarfigisassaannut naatsumik allanneqassasut aalajangiunneqartullu pisortanut allanut nalunaarutigineqarneranni ilaatinneqassasut. Imaqarniliaq akuerineqassaaq suleriaasissatut aalajangersar neqarsimasuniittut naaportorlugit, tak. § 9, imm. 1.

**§ 13.** Ilinniartitsisut rådiat kommunemilu ilinniartitsisut siunnersuisoqatigiivni pisussaangillat piginnaatitaanatillu pissutsit ilinniartitsisut tjenestemanditut atorfeqarnerannut tunngassuteqartut pillugit oqaaseqarnissaminut.

*Imm. 2.* Ilinniartitsisut rådianni imaluunniit kommunemi ilinniartitsisut siunnersuisoqatigiivni ilaasortaasoq ilinniartitsisut rådiata imaluunniit kommunemi ilinniartitsisut siunnersuisoqatigiivisa ataatsimiinnerini nutserisuusimaguni akissarsisinneqassaaq maleruagassat sukkulluunniit atortuusut malillugit.

**§ 14.** Ilinniartitsisut rådiata kommunemilu ilinniartitsisut siunnersuisoqatigiivni sulinerannut atasumik, soorlu nutserinermut, skrivemaskiinamik allannermut, nuutiterinermut, pappiaranut, frimærkenut allanullu aningaasartuutit akilerneqassapput kommunep budgettiani tamakkununga atugassatut akuerisaasut atorlugit.

**IV. Atortuulernissamik il.il. aalajangersakkat.**

**§ 15.** Nalunaarut una atuutilissaaq 1. juni 1989. Ulloq taanna atorunnaassaaq Kulturimik  
Atuartitsinermillu Aqutsisut lærerrådi, fælleslærerrådi aamma landslærerrådi pillugit kaajallaasitaat 3/80.

*Namminersornerullutik Oqartussat, Nuuk, ulloq 16. maj 1989*

Jens Lybert

/

Hugin S.Christiansen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut